

# CBETA電子佛典集成

---

CBETA Chinese Electronic Tripitaka Collection  
ebook

X60n1139

## 體仁要術

清 彭紹升著

中華電子佛典協會



# 目次

- [編輯說明](#)
- [章節目次](#)
  - [文星閣重整放生會引](#)
  - [文星閣建放生會疏](#)
  - [放生會回向文](#)
  - [南園放生池碑](#)
  - [彭氏放生池碑](#)
- [卷目次](#)
  - 1
- [贊助資訊](#)

## 編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 [service@cbeta.org](mailto:service@cbeta.org) 回報。
- 版權所有，歡迎自由流通，但禁止營利使用。

文星閣重整放生會引

彭紹升

文星閣放生會。肇自我先曾祖南昫府君。迄今數十年矣。乾隆三十九年。始闢放生池於南園木杏橋。畜生魚為獨盛。而閣中別籓隙地。養羊豕雞鶩之屬。滿則送之雲棲。頃四五年間。歲靡食料錢至六七十緡。而與會者落落不過數人。罄所入。猶不能足。則魚鳥之得蒙其利者少矣。今擬重整前會。糾司月十二人。人持簿一本。歲募人出錢三百六十。十之得三千六百。為一股。積十二股。得錢四十千有奇。隨時買放生物。有餘則以充食料。闕則募人為代。如是漸增倍屢無算。其有田之家。量捐食料。便可抵錢。歲以二月三日。通名於桂香殿。冬盡則倩僧誦經。迴向西方淨土。俾施者受者。作長壽因。種菩提果。但能盡壽為期。勤行匪懈。其為福德不可思議。第恐諸仁者偶發善心。旋復退墮。察其根原。不無蔽障。約舉大概。釐為八條。勿謂迂談。幸垂聽覽。

或謂性有五常。道兼萬善。惟茲濡沫之恩。豈合含宏之量。不知五常之德。惟仁最先。萬善之門。惟愛斯溥。舍一牛信可保民。放一麀果堪託國。愛我生而及彼生。斯為絜矩。止我殺以救人殺。是謂推恩。覆篑終必成山。涓流何難到海。

或謂自親及民。自民及物。等差既別。緩急宜分。不知禍莫慘於危亡。施莫先於穀餼。即今耕鑿之民。久離於湯火。自昔刀兵之劫。孰慘於庖厨。向涸轍而驚心。忍吝一杯之水。過屠門而大嚼。誰聞半夜之聲。

或謂天生飛走。本以養人。物實蠢頑。放之何益。不知天惟普覆。人畜齊觀。物盡貪生。自它一體。如謂以肉養人。不宜更生蔬穀。將欲貴人賤畜。奈何自比豺狼。苟仁術之未充。亦兩閒之棄物。不知責己。莫妄窺天。

或謂易尚大烹。禮崇特殺。既鈞弋之弗廢。寧魚鳥之堪憐。不知樂奏九成。虞廷有率舞之瑞。網開三面。商書垂咸若之文。惟量擴於靡遺。斯澤流於無外。所以賜生必畜。依然疏水之風。拱雉有心邈矣。山梁之作。倘殺機之未盡。何大德之能充。

或謂一方之內。一日之間。所殺甚多。所放甚少。以此準彼。曷能相救。不知大旱之年。一渠之水。亦可活數畝之田。大寒之日。一

領之裘。亦可甦一人之命。始以生而護殺。繼轉殺以全生。但使願力堅牢。決定諸魔退散。

或謂居常食肉。此日放生。一暴十寒。於事何補。不知右手扶人。左手扶人。扶者之恩。稍可抵夫扶者之毒。千日謗佛。一日念佛。謗者之罪。猶或消於念者之誠。但生機之勃發。即天理之昭彰。惟當舍舊以圖新。豈可順流而不反。

或謂檻籠甫脫。而弋伺於林。網罟乍離。而餌垂於岸。直進退之無門。雖慈悲其曷濟。不知臨決之囚。但願緩須臾之死。再生之賜。亦已游覆載之寬。殺者自殺。固定業之難逃。生者自生。庶此心之克盡。

或謂惻隱所萌。祇由乍見。生滅既盡。乃契真如。何容著相而求。豈識無為之道。不知乍見之心。本來常住。惟常住故。不緣對境而昏。真如之法。不舍有為。惟有為故。不墮偏空之執。苟定作無為之解。亦何殊著相之愚。斯邪遁之所歸。必破除而毋惑。

## 文星閣建放生會疏

薛起鳳

伏以天地定位。大德曰生。聖人成能。神武不殺。三才參立。人惟冲氣之和。四德兼行。元乃資生之本。推氣初於形始。百族一原。驗敦化於川流。並育不害。浮沉升降。紈緼化醇。凡諸含識。莫不懷生。屬在有情。皆知愛命。式觀泰古。世質民淳。人與物而相忘。物與人而共治。毳毛孳尾。但紀春秋。兩走風飛。無傷獮狢。鳥巢可俯。游魚不驚。是以麟鳳在郊。龜龍馴沼。民無夭札。物不虔劉。道光五紀之前。春在三皇之世。所謂各正性命。保合太和。不識不知順帝之則。孔子所由嘆息大同。老氏所以能知古始者也。自人心日鑿。太樸漸雕。欲念滋騰。裸氣周作。茹毛飲血。而並有爭心。肉食蠶衣。遂緣為故習。網綸矰矢。彌岡被淵。蠶腊割烹。充庖登俎。日用不察。同符自然。雖以上帝好生。不能拯物於刀七之下。羣生乞命。無以籲天於鼎鑊之中。因此殺機。遂成劫運。水火兵戈之難作。旱潦疾疫之患興。理非外來。端由自致矣。聖人順人情而為之節。不得已而去其奢。六府土穀惟修。九門置罟毋出。聞聲見殺。仁遠乎庖厨。元酒太羹。味遺於大饗。曲施禮教。隱寓慈悲。洎乎教演西迦。化行東土。流水救涸。寶勝稱名。普通唱斷肉之文。大歷刊放生之石。嫗煦萬類。濟拔三塗。他如鑿沼養魚。投弓謝鹿。放龜救蟻。縱鯉活禽。載在簡編。俱彰福應。況乃尚稽往蹟。窮測化工。鴈亦名王。鹿能生女。白帝之子為蛇。王母之伴

為雀。青衣童子。留方藥於人間。元繡丈夫。動風雷於江上。斯則化機潛運。幽感難窺。知微知顯。其神其聖。類非思議所得而詳。情識可得而及者已。欽惟元皇帝君殿下。長善體元。為民永命。盡人性以盡物性。道在至誠。善救物而善救人。功符大造。弟子等誓心懺罪。發願酬恩。幸荷生成。叨聞訓誡。欲達性天之路。先憑功德之門。竊見蘇州人物殷昌。風俗奢泰。水居陸產。塞谷盈川。漁戶屠門。連街列市。傷殘物命。數溢河沙。恣養色身。空填天塹。懼干業報。淪歷無窮。既不能使大地為嘉林。滄海為靈囿。不得不資依善地迎導生機。近推一念之仁。曲全眾生之命。文星閣舊有放生會。今願共捨淨財。續修善事。各憑願力。隨所見聞。充惻隱之端。由不忍達之於所忍。順清寧之性。念吾生不異於他生。庶幾善氣熏蒸。吉祥來止。三災不作。八難潛消。陰陽和而風雨時。物阜成而民康壽。用敢潔齊對越。激切敷詞。伏望元皇帝君。施慈忍力。開甘露門。憫彼羣迷。牖其淨信。務使人人發同體之悲。更冀世世結放生之社。自胞暨與。均遊浩蕩之天。以愛全仁。共享安恬之樂。固十地之福種。實萬善之資糧。欲令充周。尚希相協。不勝戰慄悚惶之至。謹奉疏以聞。

### 放生會回向文

彭紹升

弟子紹升。願度有情。同生淨土。故於本縣文星閣舉放生會。為現前諸眾生等。皈命三尊。稱揚佛號。願諸眾生。仗佛慈悲。等蒙攝受。從於今日。盡未來際。斷諸恐怖。竭諸煩惱。更不相吞相噬。相爭相殺。進修佛法。脫離苦海。更為與會弟子等。懺除無始以來殺生食肉種種罪緣。願令所殺眾生。所食眾生。仗佛慈悲。等蒙攝受。化怨毒心。歡喜相向。得生善道。共沐洪波。惟願弟子等。既生安養。還入娑婆。普化眾生。永斷殺因。住無盡壽。善根回向不退菩提。恭望如來。證知我願。真實不虛。三有四恩。同圓種智。

### 南園放生池碑

彭紹升

蘇州。古澤國也。環州之水。其大者為江為湖。小者為瀆為港為溪。至不可悉數。凡水居諸眾生。若巨若細。以蕃以育。宜無所不

容。然而取之者日繁。操之者日蹙。環而顧焉。幾一鱗一介之安其居而樂其生也。難矣。哀哉。於是吾黨諸賢。發慈悲心。依菩薩行。既月舉放生會。遂因園為池。與之安宅。延僧守之。取流水長者救魚故事。顏其所曰流水禪居。俾諸眾生。永斷殺因。克遂生性。不離方隅。如縱大壑。沐日浴月。騰波躍雲。樂我太平。長爾孫子。洋洋乎聖人之道。皞皞乎王者之風。觀於此者。不知手之舞之足之蹈之也。知歸學人與是勝緣。合掌贊嘆。為之銘曰。

天生萬族	既奠厥居	鳥有山林	魚有江湖
各靖封疆	罔相凌轢	保合太和	與天無極
人為物靈	胡不自思	弱肉強食	安知是非
靜觀本來	何人何物	在宥天下	清寧合一
習心所錮	殺業熾然	弋靡餘林	網無遺川
嗟爾人斯	孰不惡死	棘芒刺身	呼痛曷已
縱爾口腹	烹肥擊鮮	刀砧所過	黑眚彌天
勿謂是魚	其形甚細	苟含生性	天地同氣
爾食是魚	傷天地根	曾不自覺	爾心則昏
爾有室家	魚有妻子	相啣相濡	至於沒齒
易刀而殺	遲速惟均	爾不愛魚	胡不愛身
嗟爾人斯	夢夢三世	智眼觀之	通一無二
流離太子	昔為人漁	魚化為王	殺人如魚
是業所成	如轆轤轉	易危履霜	由不早辨
佛言孔言	異口同音	大德曰生	孔心佛心
救物之生	戒爾之殺	以生止殺	是對治法
無我無物	當生不生	我生物生	同歸覺城

### 彭氏放生池碑

彭紹升

乾隆十七年。先大人督學浙江。過里居。命兒子紹謙等。規舍後隙地為園。因其窪為池。池廣可半畝。植以荷。稍畜鯽鯉諸魚。其後數年。紹升讀書園中。又時買市上魚。縱之。玩其泳游以為樂。積二十餘年。池中魚日充仞。而吾家服屬子姓。其生長於二十餘年間者。且不下三十許人。承天地之施。沐太平之化。我生物生。非彼非此。日引月長。並育無害。紹升於是請於先大人。立碑池上。顏曰收生池。爰為之銘。以示我後人。銘曰。

池魚索索 彭氏落落 池魚烝烝 彭氏繩繩  
體仁要術(終)

---

## [CBETA 贊助資訊](#)

(<https://www.cbeta.org/donation/index.php>)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

---

## 信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

## [前往捐款](#)

---

## 信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

---



## 劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

---

## 線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

---

## 支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".

---